

Date – 09/05/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Chief Minister Pu Lalduhoman tukin khan Lunglei Municipal Council office a tlawh.
2. Central YMA chuan ruihhlo do hmalakna kal mekah Aizawl khawpuia veng hrang hrangah Street Campaign an buatsaih.
3. Suwendu Adhikari chu vawiinah West Bengal-a BJP Chief Minister hmasa ber atan lakluh a ni.
4. Rabindranath Tagore-a piancham chu vawiin hman a ni

<><><>

CM

Chief Minister Pu Lalduhoman tukin khan Lunglei Municipal Council office tlawhin, LMC Chairman Pu Lalzuithanga leh a thawhpui Councillor zawng zawngte bak ah Official ten an lo dawngsawng ani.

Chief Minister chuan he hunah hian Councillor leh official zawng zawng te chu BOC Hall ah thukhawmna hun a hmanpui a, LMC Chairman Pu Lalzuithang-an an hmalakna kawng hrang hrang leh Lunglei khawpui hmasawmna tura mamawh hrang hrang awm te sawiin , Chief Minister chuan an mamawh thlente chu theih tawpa ngaihtuah pui a tum tih a sawi.

Chief Minister hi Health & Family Welfare Minister Pi Lalrinpuii bakah MLA te Pu Clement Lalhmingthanga, Pu V. Malsawmtluanga, Pu T. Lalhlimpuia, Pu Lalramliana, ZPM Southern Hqrs. Elected OB te bakah Pi R. Lalrodingi, OSD to CM ten an tawiawm a ni.

<><><>

TOURISM

Sorkar kum liamta 2025-26 chhung khan Mizoramah khualzin mi nuai 9, sing 8 leh 518 chhinchhiah an ni a; heng zinga mi nuai 9 sing 6 sang 6 leh 60 hi India mi niin, rampawn mi (foreigner) 14,558 an awm a, hriat theih chinah kum 17 chhunga Mizorama khualzin rawn lut an tam ber kum a ni.

Tourism department-in India rama state dang mite leh rampawn atanga Mizorama rawn lut zat a chhinchhiah dan chuan, sorkar kum liamta Apri ni 1, 2025 atanga kumin March ni 31 thleng khan Mizoram lukha hrang hrang atangin khualzin mi nuai 9, sing 8 leh 518 an rawn lut a; kum 2009-10 atanga chhiarin kum 17 chhunga Mizorama khualzin an rawn luh tam ber kum a ni. Kum liamta dawta khualzin rawn luh tam ber kum chu kum 2024-25 kha niin, khami kum khan khualzin mi nuai 5, sing 2, sang li leh 784 an awm.

Kum liamta chhunga Mizorama khualzin rawn lut zinga mi 14,558 hi foreigner an ni a, foreigner zingah hian Myanmar mi 10,956 awmin an tam ber a, foreign tourist chhinchhiah zat atngin za zela 75.26 an tling. Myanmar mite dawta hian USA atanga rawn lut an tam ber a, mi 878 niin, foreign tourist chhinchhiah zat atanin zaa 6.03 an ni.

VC

Tourism department hian kum 2023-24 atangin foreign tourist bik hi an ram mal angin a tarlang a; kum 2023-24 khan foreign tourist 3,884 awmin, heng zinga 1,336 hi USA atanga rawn lut niin an tam ber a, Australia atanga rawn lut mi 298 ten an dawta. Kum 2024-25 khan foreign tourist 5,911 chhinchhiah niin, Myanmar atanga rawn lut mi 1,472 leh USA atanga rawn lut 1,222-te chu a tam ber leh a dawttu an ni bawk.

Kum 2023-24 data atanga a lan danin nikum 2025-26 thleng khan Mizorama foreigner rawn zinte zingah hian Myanmar, USA, Australia, UK, Japan leh Israel mite an tam zual a ni.

<><><>

SAHKAR SE SAMRIDDHI

India hmarchhak a Cooperative Society te tana workshop y ‘Sahkar se Samriddhi’ y chu nimin khan Aizawl Assembly House Conference Hall-ah a kharna hun hman a ni. He zir hona hi sorkar laipui Ministry of Cooperation, NABARD leh State Cooperation Department buatsaih a ni a, India hmarchhaka Cooperation Secretary-te leh Cooperative Society a Registrar te an tel a ni.

Ministry of Cooperation Secretary Dr. Ashish Kumar Bhutani chuan north-east region in harsatna a tawh bikte hre chung zela hma lak a pawimawh thu a sawi a, state tin atanga kalkhawmte chu an hmalakna kawng hrang hrangah National Cooperative Development Corporation (NCDC) tanpuina hmang tangkai turin a fuih a ni. India rama cooperative bank te pui turin sorkar laipui chuan Sahakar Sarathi leh National Urban Cooperative Finance and Development Corporation a awm tih a sawi bawk.

Chief Secretary Pu Khiili Ram Meena pawhin thu sawiin cooperative sector chuan Mizote nunah nasa takin hna a thawk a. Mizoram chu India rama a hmasa pawl ni turin Registrar Society Office chu a computerize vek tawh a ni a, Primary Agriculture Cooperative Credit Societies (PACS) 24 te pawh computerize tawh niin, 75 dang te chu computerize mek an ni a ti a. Mizoram sawrkar leh cooperative sector te chuan Bana Kaih hmangin kawng hrang hrangin hna an thawk ho tih a sawi bawk.

<><><>

CYMA

Central YMA chuan ruihhlo do hmalakna kal mekah Aizawl khawpuia veng hrang hrangah Street Campaign an buatsaih a, Central YMA hruaituten an hmanpui. Central YMA hnuaia ruihhlo do pawl, Central Anti Drugs Squad (CADS) chuan tun thla ni 1 atanga nimin thleng khan ruihhlo engemaw zat leh ruihhlo kaihnawihah mi 42 an man tawh.

Central YMA hian tukin dar 7:30 khan Aizawl khawpui chhung veng pasarih - Zemabawk, Thuampui, Bawngkawn, Ramhlun North, Chanmari, Zarkawt leh Electric Venga hmun lun laiah ruihhlo do hmalakna atan Street Campaign hi an buatsaih a; Central YMA hruaituten hmanpuiin, street campaign an neihna huam chhunga Branch YMA hruaitute leh CEC memberten an tawiawm a ni.

Kan corr report lo ngaithla ang.

VC

Central YMA chuan ruihhlo do kawngah theihtawp chhuah zel an tum thu an sawi a; mahni theihna zawn theuhah ruihhlo do kawnga pen chhuak turin mipui an sawm a. Street Campaign hi karleh Inrinni khian Aizawl khawpuia hmun 8-ah neih leh an tum a ni.

Central YMA hnuaia ruihhlo do pawl, Central Anti Drugs Squad chuan tun thla ni 1 atanga nimin thleng khan ruihhlo chi hrang hrang - heroin hãwng 8, tictac bûr 185, chhin sen 2, ganja gram 8 leh zu ûm 24 an man tawh a; hemi kaihnawihah hian mi 42 manin, Excise & Narcotics Department hnenah mi 2 an hlan a, midang 40 hi counselling class an neihpui bawk.

<><><>

LUNGLEI FORGERY CASE

Lunglei District Jail-a tang te chhuah tura document lem siamtu Jeremia Lalthangtura leh a thurualpui Ambulance driver hna thawk mek C.Laltlanhlua ten tang 17 zet an chhuah a.

Hemi chungchang chhuina Mizoram Police in vawiina an tihchhuahah Tangho hnen atang hian Jeremia hian cheng sangli atanga cheng singnga vel pawisa a laksakin an chhuah dan tur a ngaihtuah sak theih thu a hrilh a, Document lem te hi Jeremia Lalthangtura hian hmun hnih, Rahsi venga Xerox leh Printing tih theihna Computer dawr pakhat leh District Jail, Lunglei-a office computer-ah te a lo siam thin a ni. Hei bakah hian C.Laltlanhlua hian office chahbi te dil chhuakin Jeremia-a'n computer a hman laiin a lo veng thin tih hriat a ni bawk a. Heng a document siam chawp te hi C.Laltlanhlua hnenah hlanin C.Laltlanhlua hian Jail thuneitute hnenah a pe a, anni chuan Jail tang te chu an lo chhuah mai thin a ni.

Kan corr report lo ngaithla ang.

Kum 25 mi Jeremia Lalthangtura Berawlui Veng Zemabawka cheng leh a thurualpui kum 31 mi C Laltlanhlua Aizawl Republic Vengthlang te hian tang te hnen atanga pawisa an hmuh zawng zawng zat hi cheng nuai 1 sing 3 sang 5 bawr vel a ni a. An pawisa hmuh te hi Jeremia leh C.Laltlanhlua te hian an lo insem thin

tih hriat a ni a. Pawisa hi C.Laltlanhlua kutah emaw a Gpay account-ah a lut thin a ni.

Document diklo hmanga chhuah tawhte chu Lunglei Police ten zawngin, mi 11 chu an man let a, pakhat a lo thi tawh a, Khawzawl Police-in an lo man pakhat awm bawkin, mi 13 te chin hriat nghal a ni a. Chhui chhonzawm zelna atangin Document lem hmanga chhuah tak te hi mi 17 an lo ni zawk tih hriat a ni a, POCSO case te, ND&PS case leh ruk ruk case a convict tawh te an ni hlawm a ni.

Document lem siamtu Jeremia Lalthangtura leh a thurualpui C.Laltlanhlua te hi District Jail ah dah an ni a, he thil chungchang hi chhui zui zel a ni tih Mizoram Police thuchhuah chuan a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

LAWNGTLAI MGNREGS

Lawngtlai District-aMGNREGA hmanga inhlawhna kalpui mekah Internet that tawk loh avangin Chawngtelui khua chuan April thla inhlawhna pawh attendance an la mumal thei lova, an hlawh engemaw zat an chan dawn a, May thla inhlawhna tur pawh hi thawk tha thei lovin an hlawh tur pawh an hmu dawn lo niin an khaw VCP Pu Devison-a chuan a sawi.

Chawngtelui VCP Pu Devison-a chuan, an khuaah mobile internet a hman theih lova, 2g network chu awm ve mahse, attendance lak theih chang a awm pawhin an upload thei thin lo tih a sawi bawk a, Thingtlang mi harsa tak tak, hmeithai leh hnathawh tur mumal neilo, MGNREGA a anga ei hmu ve hram hram ten harsatna an tawk tih a sawi a ni.

MGNREGA hnuaiyah hian National Mobile Monitoring System (NMMS) Apps hmanga inhlawhte attendance lak thin a ni a, hnathawhna hmunah anmahni ngei kala zing leh tlai lamah thlalak angaih avangin network that loh avang hian Thingtlang khaw thenkhat te an buai pah hle niin kan corr chuan a sawi a ni.

<><><>

HNAHTHIAL

Thingsai khuaah solfa thiam an larna chawinung turin nimin CCA program hnuaiyah Thingsai HSS zirlaiten solfa an zir tan a, hei hi kum dangah pawh an lo kalpui tawh thin a ni.

Kan corr report lo ngaithla ang.

Thingsai khua hi solfa thiam khua, hla phuah thiam leh Zaithiam khua tia hriat hlawh thin an ni a, hei hi a chhan chu a bulthum chu sikula solfa an zir thiam

vang ni a sawi a ni. Kum 1950 chhovah Middle School zirlai ho zawng zawngten Pu Lena leh Pu Vanchhuma Enkawlna hnuaiah solfa an zir a. Pu Lena hla phuahthar apiang Pu Vanchhuman solfa nen a zirtir a, zirlai ho hnenah solfa thiamna an tuh nghet em em a. Biak inah, khawhar inah, zaihonaah Solfa kimin hla an sa thei zel thin a ni. Tun tumah hian Thingsai Higher Secondar School zirlaite hi Economics teacher, Sir Chiangtean solfa hi a zirtir a ni.

<><><>

WEST BENGAL

Suwendu Adhikari chu vawiinah West Bengal-a BJP Chief Minister hmasa ber atan lakluh a ni. Chief Minister lakluh inkhawm hi Kolkatta-a Brigade Parade Ground ah buatsaih a ni a. He hunah hian Prime Minister Narendra Modi, Union Home Minister Amit Shah, BJP President Nitin Nabin, Union Minister te leh NDA sawrkarnaa Chief Minister te an tel a ni. Chief Minister rual hian Cabinet Minister panga lakluh tel an ni a. Vawiina minister lakluhte hi Dilip Ghosh, Agnimitra Paul, Ashok Kirtania, Nisith Pramanik leh Kshudiram Tudu te an ni.

Pu Adhikari hi nimina BJP State Legislature Party thukhawm chuan an hruaitu atan an thlang a. Union Home Minister uapna hnuaiah BJP Legislature Party thutkhawm hi Kolkatta ah neih a ni a. Leader atana rawtna pawm anih hnuaah West Bengal Governor R N Ravi hnenah sawrkar an siam theih thu hi an thlen a ni..

<><><>

RABINDRA JAYANTI

Rabindranath Tagore-a piancham chu vawiin hman a ni a. Rabindra Jayanti Pochishe Boishakh wawi 165-na hi West Bengal h-a Santiniketan-a Visva-Bharati University bakah Bangladesh hmun hrang hrangah hman a ni a. Rabindranath Tagore-a kutchhuak thuziak, hlaphuah, lam leh lemchante zirhoa entir a ni bawk.

Vice President C P Radhakrishna leh Prime Minister Narendra Modia te chuan vawiin khan Pochishe Boishakh pual hian hriatrengna an hlan a. Prime Minister Modia chuan Pu Tagore-a khan ngaihtuahna thar leh a finna hmangin ram tan thil tha tam tak a thlen a ti. Defence Minister Rajnath Singh, Union Home Minister Amit Shah bakah Minister dangte pahwin Gurudev Rabindranath hi zahna an hlan a ni

<><><>